

REVUE SPIRITE

Journal d'Études Psychologiques
Fondée par ALLAN KARDEC



ISK

INTERNACIA
SPIRITISMA
KONSILIO

Dia Leĝo aŭ Natura Bono kaj Malbono

Selektitaj Artikoloj

Jaro 168 | N- 21 | 2025

Ĉi tiu volumo enhavas kelkajn artikolojn el la Revuo Spirite de la jaro 168, Oktobro 2025 numero 21. Ĉi tio ne estas kompleta versio. Tradukoj estas respondeco de la tradukinto.

TRADUKISTOJ KAJ REVIZIISTOJ EN ĈI TIU NUMERO

JOSÉ ROBERTO ALVES DE ALBUQUERQUE
PAULO PIRES

Revue Spirite

Journal d'Études Psychologiques

Fondée par ALLAN KARDEC le 1er janvier 1858

Havaĵo de la Internacia Spiritisma Konsilio (CEI)
Logo et Marque Européenne enregistrée à l'EUIPO
(Office de l'Union Européenne pour la propriété
intellectuelle)

® Komerca marko 018291313

Mark française déposée à l'INPI (Institut National de
la Propriété Intellectuelle) sur le numéro

® 093686835.



Redaktita de

Federação Espírita Portuguesa

Praceta do Casal Cascais 4, r/c, Alto da Damaia,
Lisboa

ISSN 2184-8068

Depósito Legal 403263/15

© copyright 2025

Jaro 168

Nº21

CSI | Kvaronjara | Oktobro 2025

Senpaga distribuo

Direkto (ISK)

Jussara Korngold

Kunordigo (FEP)

Vitor Mora Féria

Redakcia kunordigo

Sílvia Almeida

Skribo kaj provlegado

Cláudia Lucas

José Carlos Almeida

Web

Marcial Barros

Nuno Sequeira

Sandra Sequeira

Arto & Dezajno

Sara Barros

revuespirite@cei-spiritistcouncil.com

www.cei-spiritistcouncil.com

Indice

JUSSARA KORNGOLD HUMBERTO SCHUBERT COELHO	ĈEFARTIKOLO FILOZOFIO KAJ SPIRITISMO PLEJ KOMUNAJ ERAROJ EN LA DISVASTIGADO DE SPIRITISMO
JUSSARA KORNGOLD	SPIRITISMO KAJ RELIGIO BONE KAJ MALBONE SUFERI
SPIRITO NATHANAEL	FAMILIAJ PAROLADOJ DE TRANSTOMBO, HODIAU VI REVIDOS
JUSSARA KORNGOLD MÁRIO FRIGÉRI	DIVALDO SPIRITISMO KAJ RELIGIO LETERO AL SPIRITISMA MOVADO
REDAKTEJO DE SPIRITISMA MOMENTO	SPIRITA MOMENTO NE REZIGNI PRI LA BONO



Jussara Korngold

JUSSARA KORNGOLD

Pripenso kaj Spiritisma Respondeco

La 3-an de oktobro 1869 Allan Kardec revenis al la spirita mondo, lasante post si heredaĵon kiu daŭre lumigas generaciojn. Oktobro, do, ne estas nur monato de memoro; ĝi estas ankaŭ alvoko al la respondeco de ĉiu el ni por konservi kaj disvastigi liajn instruojn. Pli ol simple festi daton, ni estas invitataj pripensi la ampleksojn kaj profundon de la verko kiun li lasis al ni, kaj kiel ni, eĉ hodiaŭ, plu alportas la Spiritismon al tiuj kiuj serĉas komprenon, konsolon kaj leviĝon.

La heredaĵo de Kardec ne limiĝas al *La Libro de la Spiritoj*; ĝi ankaŭ inkluzivas *La Libro de la Mediumoj*, *La Evangelio laŭ Spiritismo*, *Ĉielo kaj Infero*, *La Genezo*, kaj multajn aliajn verkojn kiuj starigis solidan fundamenton por la studado de la spirita vivo. La *Revue Spiritisme*, kiun li eldonis dum dek du jaroj, estis alia decida ilo, malfermante spacon por debatoj, esploroj kaj la disvastigo de ideoj kiuj daŭre iluminas konsciencojn. Tiuj klopodoj ne nur firmigis la Spiritismon en lia tempo, sed ankaŭ starigis la fundamentojn por ke ĝia mesaĝo restu viva, eĉ fronte al la komencaj rezistoj de la socio.

Hodiaŭ la Spiritisma Movado spegulas tiun heredaĵon kun matureco kaj diverseco. Centoj da centroj, studgrupoj kaj karitataj iniciatoj agas tra la tuta mondo, antaŭenigante scion, solidarecon kaj la integriĝon kun scienco kaj edukado. En multaj landoj ni vidas fortan kaj aktivan ĉeeston, montrante ke la Spiritismo restas aktuala — kapabla dialogi kun novaj tempoj sen perdi la esencon de la instruoj kodigitaj de Kardec.

La hodiaŭa defio estas konservi la kvaliton de la disvastigado, eviti troajn simpligojn kiuj malfortigus la profundon de la Doktrino, kaj certigi ke racio, logiko kaj kritika rigoro restu gvidprincipoj en la spiritisma studado kaj praktiko. Ĉiu prelego, ĉiu libro, ĉiu ago de karitato estas okazo honori la memoron de Kardec, konfirmante nian sindediĉon konstrui pli justan, pli klarigitan kaj pli fratan socion.

Oktobro, do, ne estas nur monato de memoro, sed ankaŭ invito al konscia agado. Ĝi estas la momento por reafirmi, ke la Spiritismo ne limiĝas al konservado de la pasinteco, sed renovigas sin en ĉiu ago de studado, pripenso kaj amo al la proksimulo, certigante ke la lumo de Allan Kardec plu gvidas la vojon de ĉiuj, kiuj serĉas kompreni la vivon en ĝia plej profunda dimensio.

TEKSTO DE LA EKIPE N21

Teksto de la Teamo

Per ĉi tiu numero ni komencas la sesan jaron de publikigo de ĉi tiu nova serio de la *Revuo Spirita*. Kun ĝi, ni konsideras ke malfermiĝas nova ciklo, en kiu ni invitas niajn aŭtorojn direkti siajn alirojn kaj reflektadojn al la tuta aro de Moralaj Leĝoj, prezentitaj de la superaj Spiritoj al la Homaro en la fundamenta verko de Spiritismo, *La Libro de la Spiritoj*.

Ni komencas per la kadro de la temo, traktante la Dian aŭ Naturan Leĝon. Ĉi tiu leĝo regas, unuflanke, la materialan universon kun ĝiaj leĝoj, kies studado apartenas al la scienco, kaj, aliflanke, la moralan universon. Ĉi tiu, ja, konsistanta el moralaj leĝoj, rilatas speciale al la homo, al lia animo, al liaj rilatoj kun Dio kaj kun siaj similuloj. Ene de ili, ni lasas kelkajn notojn pri la bono kaj la malbono. Ni esperas, per organizado kaj kunigo de la studoj kaj reflektadoj ĉi tie prezentitaj, kontribui al la bono, "havante en vido la bonon kaj por la bono de ĉiuj¹". Ni deziras ke ĝi estu utila!

Teksto de la Kovrilo

La kompreno de la malbono kiel nescio, morala malperfekto aŭ malproksimiĝo de la Dia Leĝo, eliminante la ideon de eterneco en la eraro.

La malbono estas nur transira etapo sur la vojo de la evoluo.

La vera bono konsistas en antaŭenigi la progreson.

La tempo de Dio havas precizajn mezurojn inter la Bono kaj la Malbono, kiujn la Spirito povas uzi en la desegno de sia ekzisto laŭmezure kiel ĝi evoluas.

Nia kovrila elekto reflektas la ideon de forlaso de la eraro kaj proksimiĝo al la Bono; de malproksimiĝo de la malperfekto ĝis atingo de stato de pureco.

FRAZO

«Ni komprenu, ke la bono estas la efektivigo de la Dia Leĝo, establante la feliĉon de aliaj kun la sama justeco, kun kiu ĝi establas ĝin por ĉiu el ni. Kaj la malbono estas la turmento, kiun, eble, ni trudante al la ekzisto de la proksimulo.»

— XAVIER, F.C. *Busca e acharás*. (Emmanuel, Spirito)

¹ KARDEC, A. *La Libro de la Spiritoj* — Demandoj 629–646

FILOZOFIO KAJ SPIRITISMO

PLEJ KOMUNAJ ERAROJ EN LA DISVASTIGADO DE SPIRITISMO



Humberto Schubert

HUMBERTO SCHUBERT COELHO

BIO:

Humberto Schubert Coelho estas profesoro pri filozofio ĉe Federacia Universitato de Juiz-de-Foro, Brazilo. Li volontulas ĉe Spiritisma Societo Primitivo kaj Brazila Spiritisma Federacio.

TRADUKISTO:

Paulo Pires

RESUMO:

Sendube, la plej ofta kaj plej grava eraro post la mensogo estas la logika eraro, tio estas, la falacio. Falacioj estas mankoj de argumenta kohereco farataj de preskaŭ ĉiuj homoj. Ili estas do problemo, sed problemo kiu tuŝas ĉiujn diskursojn, tiel ke ne estus juste akuzi iun personon esti falacia; estas la argumento kiu estas malĝusta. Tamen, krom la nescio, la falacio ankaŭ montras problemon sur la limo inter moraleco kaj intelekto: la intelekta malhonesteco. Preskaŭ ĉiam neintence farata, intelekta malhonesteco devenas de manko de kritika edukado. En ĉi tiu teksto, mi montros kelkajn el la plej ofte uzataj falacioj, montrante kiel ili aperas en la spiritisma diskurso kaj kiun damaĝon ili povas kaŭzi al la publika percepto pri spiritismo.

ŜLOSILVORTOJ:

logiko, diskurso, disvastigo de spiritismo, falacioj.

La vero estas io serĉata per logiko, per la uzo de racio kaj per pacienca observado. Logiko estas la plej simpla parto de laboro por plibonigi ideojn, kaj ĝi povas esti facile formaligita. Kritika rezonado kaj observado de faktoj postulas, ĉiu aparte, specifan edukadon, malfacilan por resumi; sed logiko, estante la perfekteco de la formo, estas neduba.

En la studado pri la disvastigo de spiritismo, la faktoj kaj la kritika rezonado povas postuli pli grandajn klopodojn, sed la uzo de logiko devas esti antaŭkondiĉo, ĉar ĝia manko precize produktas la plej nedezirindan situacion: tiu de dekadenco en la kvalito kaj racieco de la spiritisma diskurso. Intelektaj kaj diskursaj dekadencoj,

kiam ĝi okazas, rezultas en manko de konvinko ĉe junuloj kaj inter tiuj, al kiuj oni unuafoje prezentas spiritismon, ĉar la parolantoj, falante en oftajn kontraŭdirojn kaj subtenante malverojn, senvalidigas la instruadon mem.

Mi naskiĝis en medio, kie oni rimarkis malpliboniĝon de la spiritisma literaturo kaj diskurso, do mi neniam havis la impreson, ke tiu kritiko estus persona. Fakte, konante la verkojn de la unuaj du aŭ tri generacioj de spiritistoj, mi havis la impreson, ke la kvalito kaj rigoreco de tiuj tekstoj estis nekompareble pli altaj ol tiuj de la lastatempaj generacioj. Tiu persona impresio fariĝis certeco kiam mi lernis pri la ekzisto kaj funkciado de logikaj falacioj, ĉar mi tiam ekrimarkis grandan nombron da ili en la spiritisma diskurso de la lasta duonjarcento.

Mi ne eniros la historiajn aŭ kulturajn meritojn de tiu intelekta dekadenco, sed limigos min objekte al tio, kio povas esti detektata en tipa prelego aŭ norma teksto produktita de la nuntempa spiritisma kulturo.

La celo de ĉi tiu diagnozo estas antaŭenigi la bonon, la konadon kaj, finfine, la veron inter la komunumoj de spiritismaj praktikantoj, ĉar logikaj eraroj kiuj firmiĝas kiel akceptitaj kutimoj finfine senkreditigas la principojn, kiujn ni celas defendi.

Tiel do, mi limigas min ĉi tie al la studado de la plej oftaj logikaj eraroj en la spiritisma diskurso. Logikaj eraroj kaŭzas pli da miskomprenoj ol falsaj observoj – ĝenerale, bedaŭrinde, homoj ne faras zorgemajn observadojn de realo kaj ne bazas sur ili siajn opiniojn. Bonŝance por ni, grandaj pensuloj identigis la plej tipajn formojn de pensaj misoj, nomante ilin *falacioj*, kiuj do estas oftaj ŝablonoj aŭ tipoj de logikaj eraroj.

Por pure didaktikaj celoj, mi dividis la plej oftajn falaciojn en la spiritisma diskurso en tri klasojn: tiaj elementaj, kiuj konsistas el tre krudaj eraroj, facile eviteblaj per iom da atento kaj edukado; tiaj meznivelaj, ankoraŭ relative bazaj, sed kiuj aŭ pli oftas aŭ pli graviĝas laŭ la kresko de la kritika edukiteco de la preleganto; kaj tiaj sofistikaĵoj, kiuj estas tiom subtilaj, ke ili estas preskaŭ neeviteblaj.

La elementaj falacioj estus tiuj, kiujn ni povas eviti per du simplaj rimedoj: memkritika edukado kaj *zorgo dum parolado*. Feliĉe, kritika kaj memkritika edukado estas fundamenta praktiko en la spiritisma kulturo kaj agado; sed, bedaŭrinde, la neprizorgo dum parolado estas la plej ofta malvirto en tiu sama grupo. Kutime, la bona preleganto estas tiu, kiu malplej zorgas pri sia parolmaniero, ĉar tiel li parolas pli "spontanee", kio estas perceptata kiel pli vera. Pro tiu sama kialo, la plej elementaj falacioj estas ĝuste tiuj, kiuj plej ofte aperas en la spiritisma diskurso kaj literaturo, dum la plej sofistikaĵoj, ĝuste ĉar ili postulas pli grandan argumentan penadon, aperas malpli ofte.

En ideala situacio, la komunumo postulus argumentojn kiuj pravigu la asertojn kaj poziciojn de la parolantoj/verkistoj, kaj tia postulo devigus nin transiri el la

elementaj falacioj, kiuj spegulas mensan pigrecon, al la sofistikaj falacioj, kiuj spegulas subtilajn erarojn kadre de sincera provo argumenti.

La plej ĝena el la falacioj uzataj de spiritistoj estas nepre ankaŭ la plej ofta: la *falacio de apelacio al emocioj*. Per ĝi, la parolanto aŭ aŭtoro evitas klarigojn kaj argumentojn, alvokante la emociojn de la aŭskultanto aŭ leganto kun la celo impliki lin pasie favore al la dezirata konkludo. Preskaŭ kunfandiĝante kun bona parolarto kaj certigante al la parolanto la publikan preferon, la emocia apelacio subfosas la noblan, edukigan kaj moraligan celon de spirita instruado, ĉar ĝi anstataŭas la konvinkajn kaj klarigajn argumentojn per konstanta psikologia kooptado. Simple dirite, oni diras tion, kion la publiko plej deziras aŭdi, por tuŝi kaj alvoki la instinktan flankon anstataŭ la racian. Ĉi tiu rimedo ankaŭ manifestiĝas per la rakonta metodo anstataŭ la argumenta; tio estas, oni evitas laŭeble la uzon de logiko kaj klarajn klarigojn pri la kialoj de aferoj – ofte kritikante la logikon kaj raciecon kiel "malvarmajn" kaj eĉ danĝerajn, kio estas formo de kontraŭintelektismo –, preferante rakontadon de emociplenaj, ofte apelaciaj kazoj, por ke la publiko ne havu emociajn defendojn kontraŭ la dirataĵoj.

Certe, parolado pli bazita sur emocia inteligenteco povas esti mem logika, sen ke ĝia enhavo estu teda aŭ tro teknika, kondukante la aŭskultanton al vera senta altiĝo. Tiu rimedo estis abunde uzata de Jesuo, ekzemple, kiu teksis simbolajn aŭ verajn scenojn, poeziajn aŭ profetajn, tamen neniam frivole aŭ sen kohereco kaj racieco.

La dua plej ofta falacio en la spiritisma predikejo ŝajnas esti la *ipse dixit*, per kiu oni deklaras "tiel estas, ĉar tiel estas" aŭ "kompreneble estas tiel" – esence, la esprimo de pura kaj simpla dogmismo. Kiel tia, ĝi meritas malmulte da nia atento, ĉar la malracieco de aserto, kiu rifuzas pruvon per evidentajoj aŭ argumentoj, estas evidenta. Tamen, ĉi tiu estas eraro, kiun homoj faras senĉese, provante venki per insistado, kriadado aŭ nura persona konvinko. La kuracilo kontraŭ naiva dogmemo estas memorigi, ke la serĉado de vero estas pli grava ol la dogma aserto de siaj kredoj kaj konvinkoj.

Dogmaj asertoj, sen akompano de pruvoj, povas ripetiĝi senĉese ĝis la publiko ilin akcepti pro aŭtomatismo. Tio estas la kazo de falacioj *ad nauseam*, en kiuj oni ripetas ion ĝis la aŭskultanto enuiĝi kaj, kun iom da bonŝanco, akcepti la aserton. Mi ne donos ekzemplojn de tio, kion mi opinias unu el la plej oftaj kaj lacigaj rimedoj de la parolado de preskaŭ ĉiuj, kiuj pretas publike paroli. Kiel observis Aristotelo en sia Retoriko, ĉiutaga diskurso venkas per laceco, kaj malmultaj estas tiuj, kiuj senpartie kaj strikte provas pravigi tion, kion ili asertas. Kune kun la pura kaj simpla dogmatismo de tia *ipse dixit*, ripetoj *ad nauseam* vere naŭzigas kaj ne faras paroladon pli konvinka.

Tre proksima al tiuj antaŭaj estas la falacio pri la *rajto je opinio*, per kiu parolanto rifuzas ajnan kontraŭargumenton, asertante ke li havas rajton je malsama opinio. Bedaŭrinde, tio estas ofta en spiritisma diskurso, kiam parolanto aldonas al senpruva aserto: "tio estas mia opinio", konsciante ke tiu supozata rajto metas sur malkonsentantojn negativan markon, kvazaŭ malkonsentantoj estus maljustaj, aŭtoritatemaj aŭ misuzemaj, kaj ne permesus rajton je opinio. Tamen, okazas ke seriozaj aferoj *neniam* estas decidataj surbaze de opinioj, kaj tiuj, kiuj uzas tiun

falacion, ne nur faras logikan eraron, sed ankaŭ moralan, malaltigante gravajn demandojn al kampo de prefero aŭ persona opinio, kio estas malprudenta.

Eble la plej diskutata falacio estas tia *ad hominem*, kiu malkvalifikas la personon por eviti alfronti la argumenton. Ni ofte trovas ĝin en spiritisma medio rilate al aliaj religioj kaj kredoj, kelkfoje ankaŭ rilate al politika sinteno kontraŭa al tiu de la parolanto, ekzemple, kiam sufiĉas diri, ke tiu aŭ alia persono estas katolika aŭ ŝamanisma, maldekstrula aŭ dekstrula, por malvalidigi lian parolon. Fakte, tia akuzo ne nur ne malvalidigas iun ajn diskurson, sed ĝi ankaŭ malkaŝas antaŭjuĝojn flanke de la parolanto. Aserti ke iu eraras nur pro liaj politikaj aŭ religiaj apartenoj tute ne ŝanĝas la meritojn de la argumentoj. Krome, estas speco de malkuraĝo akuzi kaj ataki la personon por fuĝi de la argumentoj, kiujn li prezentis.

Derivaĵo de la *ad hominem* estas la *motiva falacio*, kiu rifuzas konkludon nur surbaze de juĝo pri la motivoj de tiu, kiu ĝin prezentas. Ekzemple, la fakto ke iu profitas el ideo ne signifas nepre, ke la ideo estas malĝusta, aŭ ke la persono ĝin defendas *nur* ĉar li ricevas ian profiton per ĝi. Jes, estas vero ke tia motivo vekas suspektojn pri ebla distordo de la argumento, sed la argumento mem daŭre havas proprajn meritojn, sendepende de la motivoj de la parolanto.

La *ĝeneraligo tro hastema* estas ankaŭ unu el la plej konataj kaj diskutataj falacioj ekster la filozofiaj medioj. Ĝi okazas kiam la parolanto naive konkludas ion ĝeneralan surbaze de siaj propraj observoj. En la spiritisma medio, la uzo de tiu ĉi falacio kreskis dum la lastaj jardekoj, paralele al la tendenco al paroladoj pli opiniaj kaj bazitaj sur personaj perceptoj kaj spertoj, kaj ne sur seriozaj studoj. Fariĝis banalaĵo uzi esprimojn kiel “mi vidas tion ofte en mia konsultejo” aŭ “nuntempe oni rimarkas tion ĉe la ĝejnuloj”... Ĝenerale, la asertoj kiuj sekvas tiajn enkondukajn komentojn ne havas necesan rilaton al ĉiuj homoj, ĉiuj ĝejnuloj aŭ ĉiuj X, por ajna X. Ili estas observoj, kiuj spegulas kelkajn spertojn, ofte forte kondiĉitajn kaj partiajn, ĉar miaj pacientoj, miaj lernantoj aŭ miaj parencoj klare apartenas al specifa segmento de la homa socio, kaj eblas ke iliaj kondutoj similas simple ĉar ĉiuj apartenas al tiu sama tavolo de la realo, kiu estas multe pli kompleksa.

Supraĵaj interpretoj de komplikaj situacioj povas ankaŭ favori *konfirmajn partiecojn* rilate al antaŭkonceptitaj ideoj. El la fakto, ke la komunumo de spiritismaj praktikantoj rapide maljuniĝas, oni konkludas kun certeco, ke ekzistas nekapablo eduki kaj engaĝi pli junajn generaciojn. Sed la afero estas tiom kompleksa, ke ĝi povus impliki dekon da kaŭzoj, kaj estus malhoneste aŭ nemature agi tiel — kiel oni ofte vidas — indiki ununuran kaŭzon kiel klarigon de la fenomeno. Tre verŝajne, tiuj kiuj tion farus havos vidpunkton jam kondiĉigitan de iu prefero, limigita sperto aŭ antaŭjuĝo.

Eblas, ekzemple, ke kulturaj, ekonomiaj aŭ politikaj ŝanĝoj havas pli grandan influon sur la malintereso de ĝejnuloj pri spiritismaj agadoj ol la supozata malsukceso de antaŭaj generacioj en ilia formado kaj edukado. La ĝusta sinteno estus analizo kiu konsiderus ĉiujn faktorojn, kaj kiu humile inkluzivus eĉ la eblon, ke nekonataj faktoroj ludas rolon en tiu fenomeno.

Alia falacio, kiun oni aŭdas *ad nauseam*, estas tiu de la *pajlohomo*, per kiu la spiritisma parolanto malgrandigas, mokas aŭ malaltigas iun kontraŭulon, kun la celo eviti la bezonon respondi al liaj argumentoj.

La preferataj celoj de la falacio de la pajlohomo kutime estas la materialistoj, pri kiuj oni diras, ke ili estas egoistaj, ke ili ne havas sufiĉan spiritan evoluon kaj sekve estas erarantaj. Kvankam ĉi tiuj asertoj veras por iuj kazoj, ili certe ne adekvate priskribas ĉiujn kazojn, kiel tiujn de sciencistoj aŭ humanistoj, kiuj ankaŭ sekvas filozofian materialismon. Tiel, la ĝenerala malestimo de materialistoj kiel malbonaj, nesciaj aŭ senkonsciaj personoj fakte reflektas intelekta malhonestan supozon, ke ĉi tiuj homoj ne estus kvalifikitaj opinii pri spiritaj aferoj.

Kvankam ili povas okazi ankaŭ pro nescio aŭ naiveco, en bonintence, la malrekomendo kaj malaltigo de la oponento estas inter la plej oftaj strategioj de *intelekta malhonesteco*, ĉar ili celas silentigi la kontraŭulon anstataŭ debati kun li pri polemikaj punktoj, kio povus ja krei malfacilaĵojn *por mi* mem. Ĝuste pro tiaj sintenoj Sokrato, fondinte la filozofion, ligis la metodon serĉadon de vero al morala sinteno, al honesteco en la esplorado kaj en la prezentado: tio estas, al enketado kiu pridubas miajn kredojn kaj antaŭjuĝojn same kiel tiujn de miaj kontraŭuloj. Tiu sinteno, konkludis Sokrato, estas ekstreme malfacile akirebla kaj subtenebla, ĉar la plej granda parto de la paroloj baziĝas sur antaŭjuĝoj, kredoj kaj personaj aŭ grupaj intereso, kaj li nomis tion intelekta malhonesteco aŭ nepretigo al la serĉado de la vero. Tiel, laŭ Sokrato — aŭ Platono, aŭ Aristotelo — nia normala pensostato estus malhonesto, kaj la supreniro al la perfekta digno de la diskurso estas unu el la plej malfacilaj kaj altaj misioj de la homo sur la Tero. Sekve, kiel honesta debatanto, mi devas nuligi la falacion de la pajlohomo per la virto kontraŭa al ĝi: la karitata principo, tio estas, prezenti la argumenton de kontraŭulo en ĝia plej bona versio, kiel eble plej juste kaj komplete, kaj nur poste *eniri la debaton*. Eviti debaton estas ĉiam fuĝo el la racio, kaj la rekta vojo al mallumo kaj nescio.

Mi finas ĉi tie la liston de la plej elementaj falacioj, kvankam iuj logikistoj inkluzivas en tiu listo la du sekvajn, kiuj estos diskutataj: *argumentum ad ignorantiam* kaj *post hoc ergo propter hoc*. La kialo, kial mi ne inkluzivas ilin inter la plej oftaj elementaj falacioj en spiritisma diskurso rilatas al la impresoj, ke ili ne estas tiel oftaj, kaj ke, almenaŭ parte, tio okazas ĉar ili ne estas tiel elementaj, spegulante pli grandan intelektan sofistikecon de la preleganto.

Ad ignorantiam, aŭ alvoko al nescio, estas la uzo de nescio kiel argumento. Dirite tiel, estus malfacile ke iu erarus tiel, sed, en la plej multaj kazoj, ĝi estas uzata bonintence por emfazi ke la kono havas limojn (kio estas vero kaj devus esti konsiderata en racia diskuto). Do, la komplekseco de ĉi tiu tipo de falacio kuŝas en la fakto ke bona edukado kondukas nin al pli zorgema observado de la limoj de la scio, kaj ke asertoj aŭ kredoj ne povas esti dogme kaj aŭtomate malakceptitaj nur pro manko de pruvoj. Fine, multaj el la kredoj de kiuj la socio dependas mankas je solidaj pruvoj. Tiel, la spiritisma ekspozicianto kiu emfazas ke "neniu povas prui ke Dio ne ekzistas", esprimas veron, sed, samtempe, malsukcesas racie diskuti la demandon pri la ekzisto de Dio. Ni disponas je pli ol sufiĉa literaturo traktanta la argumentojn kiuj sugestas la ekziston de Dio, por ke

la superforta plimulto de ekspoziciantoj insistu je falacio kiu nutras sin el la hontemo kaj manko de argumentoj fronte al ateismo kaj materialismo.

Post hoc ergo propter hoc (se io okazis post tio, ĝi estis kaŭzita de tio) estas tipo de falacio kiu ankaŭ postulas antaŭan sufiĉe racian rezonadon, ĉar ofte tio, kio antaŭas, vere anoncas aŭ kaŭzas tion, kio sekvas. Estas vere, ke la kaŭzo de iu evento antaŭas tiun eventon, sed multaj aliaj aferoj povas antaŭi eventon sen havi iun ajn rilaton kun ĝiaj kaŭzoj. Imagu klasĉambron, el kie oni aŭdas industrisirenon du minutojn antaŭ la paŭzo. La sireno estas aktivigita de la apuda fabriko, kaj ĝia celo estas reguligi la laborŝanĝojn de ĝiaj laboristoj. Tamen, lerneja infano povus imagi – malĝuste dedukti – ke la sireno estas agordita por anonci la manĝopaŭzon. Kvankam ekzistas forta korelacio inter la sireno kaj la horo de la lerneja paŭzo, kaj kvankam tiu korelacio estas fidinda, permesante al la lernantoj scii ke mankas du minutoj ĝis la paŭzo, ne ekzistas interna ligo inter la du eventoj, kaj, eĉ pli grave, ne ekzistas kaŭza rilato inter ili: la sireno nek produktas nek anoncas la lernejan paŭzon.

Ekzistas ankaŭ falacioj kiuj, pro sia subtileco, estas tre malfacile detekteblaj, kaj same malfacilas ke ni edukiĝu por eviti ilin. En la kazo de la jenaj pli rafinitaj falacioj, do, estas neverŝajne ke eĉ atento kaj bona preparo sufiĉos por ilin elimini.

La unua el la rafinitaj falacioj preskaŭ konfuzebblas kun retorika rimedo por deturni la atenton de la aŭskultanto al la signifo celata de la parolanto. Temas pri la falacio de emfazo, en kiu la konotacio direktas – kaj ofte misformas – la sencon de frazo dirita aŭ interpretita de la parolanto. Ekzemple, en la frazo “Moseo ricevis la ordonojn de Dio”, la parolanto povas deturni la atenton de la publiko al la celata konotacio simple per emfazo de certa vorto. Se la parolanto diras “**Moseo** ricevis la ordonojn de Dio”, li emfazas la gravecon de Moseo, aŭ sugestas ke nur li povus esti la protagonisto de tiu historia epizodo; se li diras “Moseo **ricevis** la ordonojn de Dio”, li emfazas ke Moseo ne kreis aŭ koncipis la ordonojn, sed ricevis ilin tiaj, kiaj ili estas; se li diras “Moseo ricevis la **ordonojn** de Dio”, li emfazas ke la profeto eble ne nepre meritis aliajn revelaciojn aŭ aliajn favorojn de Dio krom tiuj, kaj tiel plu.

Amfibolio estas bone konata inter spiritistoj, estinte rekte traktita de Kardek en la enkonduko de *La Libro de la Spiritoj*. Temas pri la fenomeno de konfuzo pri la signifo de vorto pro la diverseco de signifoj kiun la vorto mem enhavas. Kardek rimarkis, ke tio estas unu el la kialoj, kialj ni devus evoluigi novajn konceptojn kaj terminojn, evitante la uzon de aliaj jam tro ŝarĝitaj de ordinara lingvouzo aŭ de teologiaj signifoj. Ekzemple, en la frazo “Joĉjo renkontis Martan en ŝia domo”, kies domo estas tio, de Joĉjo aŭ de Marta? La ambigueco okazas ĉar la vorto “ŝia” povus rilati al ambaŭ. Se mi diras “vi povas foriri, mi restos kun via sako”, ĉu mi volas diri ke mi restos tie atendante vin, aŭ ke mi kunprenos la sakon kaj poste redonos ĝin? Ĝuste pro ĉi tiu kaŭzo, la spiritisma preleganto devas esti singarda pri la senpripensa uzo de vortoj kiel animo, ektoplasmo, mediumo, mediumeco, spirito, personeco, konscio, morto, perispirito, vivo, evoluo, feliĉo – kaj mi evitos plilongigi la liston *ad infinitum*.

La problemo de amfibolio estas la ambigueco, sed ekzistas kazoj en kiuj la ambigueco estas facile solvebla – kaj tiuj povas reflekti pli da ruzeco ol manko de atento. Tial, iuj preferas distingi de la amfibolio (fundamente semantika konfuzo

derivita el la naturo de la vorto) ĝian derivaĵon, la falacio de ambigueco, en kiu la konfuzo povus esti celita de la parolanto. En la homsciencaj fakoj de universitatoj, oni multe diskutas pri tio, kion Hegelo efektive intencis diri kiam li parolis pri la "fino de la historio". Ĉu li celis la finon kiel ĉeson, aŭ kiel celon? Ĉar la kompreno de ĉi tiu demando postulas plurajn jarojn da studado, malmultaj vere atingas la konkludon ke li parolis pri la celo. Tamen, la ŝajna signifo por ĉiu, kiu ne investis tiujn jarojn en la studado de idealismo, estas la malo: ke Hegelo parolas pri la konkludo aŭ fermo de la historio de la spirito. Kvankam la tre maloftaj specialistoj pri idealismo insistas pri la unua signifo, la superforta plimulto de interpretantoj indikas la duan, ĉar estas malkomforte agnoski ke tio, kio ŝajnas esti, ne estas.

Inter la plej akademiamaj prelegantoj, unu el la plej oftaj eraroj ne estas ligita al baza logiko, sed pli al pesimisma aŭ tragika mondrigardo, aŭ al drameca maniero esprimi sin. Tio estas la kazo de la falacio de la glitiga deklivo, kiu ricevas sian nomon de la intuicia ideo ke gliti sur deklivo neeviteble kondukas al tragedia akcidento. Ekzemple: "se maljunulo glitas sur tiu deklivo, li estas perdita" aŭ "se iu glitas de tie, li rompos la kruron, minimume".

Tiu ĉi falacio esprimas ioman pesimismon aŭ katastrofismen, sed la vero estas, ke ne eblas scii kiuj estos la ĝustaj konsekvencoj de la falo. Eblas ke nenio grava okazu kaj la persono simple releviĝu; eblas ke el cent homoj kiuj glitas, nur kvar suferu seriozajn akcidentojn, kaj naŭdek ses eliru sen vundoj.

Tamen, la falacio de la glitiga deklivo ludas kun niaj antaŭjuĝoj, biasoj kaj timoj, intensigante ilin. Ĉiutagaj ekzemploj de pesimismo aŭ paranojo estas frazoj kiel: "se tiu kandidato venkos la elekton, estos la fino de la mondo", aŭ "se oni liberigos kanabon, tio kondukos al aliaj drogoj, kaj ĉiuj fariĝos drogdependuloj". Kvankam estas vere, ke ekzistas tre malbonaj kandidatoj, kaj ke kanabo povas kaŭzi gravajn damaĝojn al mensa sano, ne estas neeviteble ke la mondo finiĝos pro elekto, aŭ ke ĉiuj ekuzos kanabon kiam ĝi estos leĝigita. Tiaj pensoj ignoras la kompleksecon de la implikitaj aferoj: ke lando estas pli ol la prezidento, aŭ eĉ ol la registaro; ke ne ĉiuj volas fumi kanabon; kaj ke ekzistas multaj kialoj por evoluigi drogdependecon, la leĝeco aŭ disponeblo de la substanco estante nur unu el ili.

Tio ne signifas, kompreneble, ke ni devus voĉdoni por tre malbona kandidato por prezidanto, aŭ ke estus etike subteni la leĝigon de substanco damaĝa por la cerbo. Sed la valideco de tiaj konkludoj ne pravigas la troigojn kaj la *formale* malĝustajn argumentadojn prezentitajn antaŭe.

Prelegantoj kiuj ŝatas citi sciencajn studojn ofte falas en la falaciojn de *falsa analogio* aŭ de *subpremado de evidenteco*. En la lasta, oni elektas la sciencajn evidentecojn favorajn al la konkludo de la parolanto, ignorante la studojn kiuj kontraŭdiras ĝin; en la unua, oni kreas falsajn analogiojn inter situacioj aŭ procezoj tute malsamaj. La plej ofta ekzemplo estas la tiel nomata kvantuma ŝarlatanismo, kiu infestas preskaŭ ĉiujn spiritismajn kaj ezoterajn mediojn de nia tempo. Surbaze de veraj procezoj de la naturo, priskribitaj de kvantuma mekaniko, oni kreas analogiojn kiuj etendiĝas de la resanigo de la korpo ĝis ŝanĝoj de personeco, sen ke estu ia ajn racia bazo por supozi, ke tiaj analogioj validas en la reala mondo.

Fine, io kio ofte eskapas al la novuloj en la studado de falacioj estas la fakto, ke fari logikajn erarojn ne signifas, ke la parolanto malpravas. Plej grave, tio ankaŭ ne signifas, ke la parolanto ĉiam malpravas, kvankam li eble eraras pri iuj aferoj aŭ formulis malĝustajn argumentojn. Ĉi tiu supozo ofte kondukas al la *alvoko al la falacio*, tio estas, la falacio de la falacio: konkludi ke, pro erara aŭ falacia argumento, la konkludo mem estas nevalida aŭ malvera. Estas tute eble, ke persono argumentu malbone, faru multajn erarojn, sed ke tio, kion li defendas, estu vera, morale bona, kaj tiel plu. Fakte, la kialo pro kiu ni restas spiritistoj malgraŭ aŭdinte tiom da nelogikaj kaj nevalidaj formuliĝoj estas tio, ke ni estas konvinkitaj ke, malgraŭ tiuj eraroj, tio, kion la prelegantoj defendas, estas vero aŭ proksima al la vero. Jen ankaŭ la kialo, kial ni estas morale indulgemaj al malbonaj prelegoj: ni estas konvinkitaj ke malantaŭ ili ekzistas bonaj intencoj, kiuj povas esti intuicie ĝustaj aŭ simple reprodukti tradicion de pli seriozaj studoj, kvankam la preleganto mem eble ne estas altnivela por la tasko.

SPIRITISMO KAJ RELIGIO BONE KAJ MALBONE SUFERI



Jussara Korngold

JUSSARA PRETTI KORNGOLD

BIO:

Jussara Korngold estas Ĝenerala Sekretariino de la Internacia Spiritisma Konsilio, eksprezidanto kaj nuna vicprezidanto de la Usona Spiritisma Federacio. Fondinto kaj prezidanto de la Novjorka Spiritisma Grupo. Preleganto, verkisto kaj spiritisma tradukisto.

TRADUKISTO:

José Roberto Alves de Albuquerque

REVIZIISTO:

Givanildo Ramos Costa

RESUMO:

Bone kaj Malbone Sufere estas pripenso pri la rolo de doloro kaj sufero en la evolua vojaĝo de la homo. La teksto invitas al la kompreno, ke la sufero ne estas celo en si mem, sed edukilo, kiu povas transformiĝi en lumon kiam oni ĝin akceptas kun fido, pacienco kaj rezignacio. Ĝi montras kiel la interna sinteno antaŭ la provadoj — inter ribelo kaj akcepto — difinas ĉu ili fariĝas malliberejoj de amareco aŭ ŝtupoj al spirita leviĝo. Traktante la gravecon de harmoniigi pensojn kaj agojn kun la diaj leĝoj, la teksto inspiras serĉi internan trankvilon kaj vidi en la doloro la ŝancon vekti la dia esenco dormanta en la koro.

ŜLOSILVORTOJ:

Bone kaj Malbone Sufere, doloro kaj sufero en la lumo de la Spiritismo, spirita evoluo, rezisteco, fido kaj akcepto.

Rilatante al iu fragmento de *La Evangelio laŭ Spiritismo*, Allan Kardec, ĉapitro 5, ni trovas en la ero 18 tekston de la Spirito Lacordaire pri "bone kaj malbone suferi". Li citas unu el la feliĉigaj diroj de Jesuo, "Feliĉaj la afliktitoj, la Ĉiela Regno apartenas al ili", klarigante, ke, por ke ni konkeru tiun feliĉigan pozicion, ne sufiĉas nur suferi, ni bezonas scii suferi. Ni bezonas, en la doloraj momentoj, defioj kaj elprovoj, elmontri nian veran fidon al Dio. Laŭ Lacordaire, la parolo de Jesuo "Feliĉaj la afliktitoj" povas do esti tiel tradukita: "Feliĉaj tiuj, kiuj havas okazon

elprovi sian fidon, firmecon, persistemon kaj submetiĝon al Dia volo, ĉar Ili havos centobligitan ĝojon mankantan al ili surtere, tial post la laboro venos la ripozo."

Sed kiel ni povas konkeri tiun fidon? Kiel ni povos, en momentoj de ekstrema malfacilaĵo, profiti la doloran elprovon, konvertante ĝin en lumvojon?

Nia tendenco ankoraŭ estas iĝi viktimo de la destino, kaj, tiel nature tia stato instaligas en ni, ke paradokse ni rezistas kaj eĉ sabotas nin mem, kiam oportunoj por pliboniĝo prezentiĝas al ni. Ni cedas al la pesimismo. Ne malmultas tiuj, kiuj, komentante pri siaj spertoj, diras al ni: "Ha, la vivo estas tia mem, la sufero estas ĝia parto."

Ĉu fakte estas por tio, ke Dio kreis nin?

Ni trovas en *La Libro de la Spiritoj*, en la ero 132, la sekvan demandon: "Kiu estas la celo de enkarniĝo de la Spiritoj?" Tiuj respondas, ke esence ĉi tie ni reenkarneblas por atingi la perfektecon, por kulpelpagi kaj plenumi iun mision. Ili aldonas, ke "la enkarniĝo ankaŭ havas alian celon: iĝi la Spiriton esti en tiaj kondiĉoj, ke li plenumu sian parton en la Dia verko. Por tiu plenumado li ekprenas, sur ĉiu planedo, veston konforman al la esenca materio de tiu planedo, cele sur ĝi plenumi, de tiu vidpunkto, la ordonojn de Dio. Tiel, samtempe kiam li kunhelpas por la ĝenerala verko, li mem perfektigas."

Laŭ la supra respondo ni konkludas, ke la ĉefa celo estas nobligi niajn spiritojn per travivaĵoj, kiuj kontribuos por ke ni, plej rapide, veku en ni la dian esencon.

Léon Denis al ni diras en la verko *La problemo de la estulo, la destino kaj la doloro*, ke "la doloro estos necesa dum la homo ne pensu kaj agu laŭ la eternaj leĝoj; ĝi ne plu ekzistos tuj kiam regos la harmonio. Ĉiuj niaj malbonaĵoj devenas de tio, ke ni agas en kontraŭa direkto al la dia fluo; se ni denove eniros tiun fluon, la doloro malaperos kune kun la kaŭzoj ĝin naskantaj." (Denis, jaro.)

Sed ni scias, kiel ankoraŭ estas malfacile por ni ekzisti en plena harmonio kun la dia leĝo. Tio, kion ni povas nuntempe fari, estas interna laboro por malgrandigi nian orgojlon kaj egoismon, por ke nia penso ne tiel deflankiĝu de la altaj idealoj.

Kiam la doloro vizitos nin, eblos al ni sekvi laŭ unu el tiuj du vojoj, tiu de la respondeco aŭ tiu de la ribelo. La respondeca vojo signifas konsciiĝi pri niaj agoj, komprenante, ke ĝi multfoje prezentiĝas por ke ni liberigu nin aŭ por ke ni sekvu laŭ la vojoj ankoraŭ pli dolorigaj. Ni prenu ekzemple la pozicion de la ŝafpaŝtisto, kiu, prizorgante siajn ŝafinojn, multfoje estas devigita uzi sian bastonon, por ke ili ne iru al la abismo aŭ aliaj danĝeraj vojoj. Tiel agas Dio kun ni, ĉar, prizorgante kun senfina amo ĉiun estulon de sia ŝafaro, Li permesas, ke situacioj de la vivo evitu, ke ni malsimpligu ankoraŭ pli nian vivvojaĝon.

Malfeliĉe multaj el ni elektas la duan vojon, kiu estas tiu de la ribelo. Ni konflikteblas kun Dio kaj la mondo, ĉar ni ne akceptas, ke niaj provoj devenas de niaj agoj. Tiam la orgojlo ĉeestas kaj ni ekvojaĝas tra la ciklo de akcepto, starigita de la svisa psikiatrino Elizabeth **Kübler-Ross** (1926 – 2004), ankaŭ konata kiel la funebra ciklo. Ili estas la negacio, kiam ni ne akceptas, ke la fakto povas esti okazanta kun ni, la kolero, kiam ni esprimas nian ribelon kaj malkredon, la ŝanĝo, kiam ni ekkomencas serion da negocoj kun ni kaj kun Dio, per malplenaj promesoj, la depresio, kiam ni notas, ke tiu ribelo estas senutila kaj ni poziciigas

kiel viktimoj de maljusteco kaj, finfine, la akceptado, kiam la leciono estas lernita kaj ni komprenas, ke ni devas trovi solvojn kaj iri antaŭen tra la faktoj de la vivo.

La rakonto pri la kverko kaj la du junkoj multe nin instruas rilate niajn sintenojn antaŭ la vivo: Grandega kverko estis elradikigita de la vento kaj forĵetita en rivereton. Ĝi falis apud kelkajn junkojn kaj demandis al ili: "Mi scivolas kiel vi, tiel malpezaj kaj malfortaj, ne estas tute dispremitaj de tiuj fortaj ventoj." Ili respondis: "Vi luktas kontraŭ la vento kaj konsekvence vi estas detruita, dum ni, kontraŭe, kliniĝas pro minimuma blovo, tiel, ni restas nerompitaj kaj ni postvivas."

Kiam ni travivas malfacilaĵojn, ni povas reagi kiel la kverko, luktante, plendante kaj petante Dion, ke Li formovu la baron de nia vivo, aŭ ni povas nin akomodi al ĝi, klinante kaj skuante kiel la junkoj, lasante Dion konduki nin tra la vento, tutajn kaj pli fortajn ol antaŭe.

Jen estas la diferenco inter alfronti, kontraŭstari kaj provi detrui la baron, kaj ĝin akcepti, kliniĝante antaŭ la cirkonstancoj de la vivo.

Budho alparolas nin, ke "la doloro estas deviga, la sufero estas opcio". Tial nepras scii suferi, eltirante la lumajn benojn ofertatajn de la doloro al la koro soifanta pacon.

La Spirito Cipriana, en la libro *En la Plej Granda Mondo*, ĉapitro 5, dialogante kun Spirito, kiu turmentas enkarniĝintan fraton, atentigas lin pri la fakto ke, kvankam li estis vera viktimo de alia, anstataŭ uzi la oportunon por kreski, li lasis sin regi de malamo. Ŝi diras, "la martiro estas didevena problemo. Provante ĝin solvi, povas la spirito altiĝi al la lumanta pinto aŭ fali en tenebran abismon; tial, ĉar multaj eltiras el la sufero la oleon de la pacienco, per kiu ili lumiĝas cele venki la proprajn mallumojn, dum aliaj el ĝi eltiras ŝtonojn kaj dornojn je ribelo, per kiuj ili sin ĵetas en la ombron de la krutaĵoj."

Ni estu fortanimaj, ni elprenu el la sufero la oleon de la pacienco, kaj ni komprenu, ke la maldolĉaĵoj de la vivo nur okazos dum nia animo troviĝos disonance kun la dia harmonio. Al ni diras Léon Denis, ke, "laŭ la animo altiĝas al pli vivanta klareco, por pli ampleksa vero, por pli perfekta saĝeco, la suferaj kaŭzoj mildiĝas, samtempe kiam malaperas la vanaj ambicioj, la materiaj deziroj. Kaj de staĝo al staĝo, de vivo al vivo, ĝi penetras en la grandan lumon kaj la grandan pacon, kie la malbono estas nekonata kaj nur regas la bono! La destino, pro tio, ke ĝi estas senlima, al ni ĉiam preparas novajn eblecojn por pliboniĝo. La sufero estas nur korektilo kontraŭ niaj misuzoj, niaj eraroj, instigo por nia marŝado. Tiel, la suverenaj leĝoj montriĝas perfekte justaj kaj bonaj; ili ne trudas al iu ajn senutilajn aŭ nemeritajn punojn." (Denis.)

Dio ĉiam akompanas nin je sia senfina amo. La bonfarantino Joanna de Angelis konfirmas la amon de la Patro en la malfacilaj momentoj de nia vivo, dirante, "la doloro estas beno sendita de Dio al Liaj elektitoj". (Kardec)

La elekto estas nia:
Ni povas travivi la amarecon kaj la galecon
Aŭ elekti la konekton kun la ĉielo

Ni povas elekti travivi veran inferon
Aŭ altiĝi per niaj emocioj al la eterno

Ni povas enfermigi nin ĉe la ĉeesto de la doloro
Aŭ malfermi niajn flugilojn elektante la amon

Kial elekti la suferon
Kiam ni povas renovigi la senton?

La krio eĥanta la malesperon
Povus fariĝi la laŭdo de la espero.

Ne vivu do en aflikto
Transdonu al Jesuo vian koron.

Bibliografio:

KARDEC, Allan. *La Evangelio laŭ la Spiritismo*. Braziljo: FEB.
KARDEC, Allan. 2006. *La Libro de la Spiritoj*. [Traduko de Evandro Noleto Bezerra]. Braziljo: FEB.
DENIS, Léon. *La problemo de la estulo, la destino kaj la doloro*.
XAVIER, Francisco C. (André Luiz, Spirito).. *En la Plej Granda Mondo*. Braziljo: FEB.

FAMILIAJ PAROLADOJ DE TRANSTOMBO, HODIAU VI REVIDOS

De la Spirito Nathanael

Tiu rideto, kiu lumigis viajn tagojn;
Tiu rigardo, kiu kvietigis viajn sentojn per spiro de kompreno;
Tiu voĉo, kiu transformis momentojn en melodion, donante al vi pacon kaj esperon;
Tiu brakumo, kiu subtenis viajn paŝojn, instigante vin en tagoj de malvenko-lernado, kaj levinte vin en tagoj de venko super viaj defioj...

Ili ankoraŭ vivas!

Via amata, kiu antaŭiris vin post plenumi sian tempodaŭron de spertoj en la tera vesto, atendas vin trans la limo, fidante je via pacienco kaj kuraĝo.

Ili akompanas viajn paŝojn sen interrompi la necesajn spertojn por via spirita kaj morala kresko, sed restas proksime, inspirante vin por ke la lumo de espero neniam estingiĝu.

Ne cedu al malfortiĝo, nek forlasu viajn familiajn devontigojn aŭ profesiajn respondecojn.

Dediku viajn horojn memorante ilin, honorante ilin per viaj agoj de bono kaj amo.

Kiam larmoj plenigas viajn okulojn pro la sopiro, kiu vin vizitas, ne lasu malesperon superregi vin.

Levu viajn pensojn en preĝo kaj konfidigu vin al Dio, kiu renkontos vin, trankviligante vin kaj donante forton por daŭrigi.

Tiu, kiun vi tiel profunde amas, en la senmorta vivo daŭre amas vin!

Ne fiksi vin al la doloro, nek vundu vin plu.

Memoru, ke ĉiu tago alproksimigas vin al la momento de revido. Sed vivu ĉiun tagon plene, kun intenseco kaj kvalito, konstruante en vi la spiritan geedziĝan veston de moralecon, kiu permesos vin reeniri al tiu, al kiu vi dediĉas senmezuran amon.

Kiam vi finos viajn difinitajn horojn de spirita edukado en la pasema kampo de homaj luktoj, vi revidos tiun rideton, tiun rigardon, tiun voĉon kaj tiun brakumon, kiuj por momento estis fizike forestaj.

Via granda amo ne pereis por ĉiam.
Estis nur paŭzo... sed iliaj okuloj neniam deturniĝis de vi en la vera senco de la senfina vivo.

Atendu kun pacienco. Iru kun fido. Faru bonon sen laceco.
Vivu intense kun la koroj, kiuj restas, kaj en la estonteco vi ĝojos, revenante al senfina komuneco kun tiu, kiu neniam vere foriris de vi.

Nathanael

Mesaĝo psikografieita de la mediumo Orlando Noronha Carneiro, ĉe la Spirita Centro João Batista, la 24-an de oktobro 2017, en Wenceslau Braz – Paraná.



Jussara Korngold

JUSSARA PRETTI KORNGOLD

Paroli pri Divaldo Pereira Franco estas, antaŭ ĉio, ago de respekto. Kiel eblas esprimi per vortoj la vastecon de spirito, kiu faris sian ekziston himno de amo — por la vivo, por la homaro, kaj por Dio? Preskaŭ ne eblas kondensi en frazoj la grandiozecon de iu, kiu dum preskaŭ jarcento estis nelacigebla semanto de espero, karitato, kaj la Evangelio en la koroj de milionoj tra la mondo.

Divaldo forpasis al la Spirita Mondo la 13-an de majo 2025, kaj ni sentas, kun la delikata sentemo de tiuj kiuj amis lin, la pezon de lia fizika foresto inter ni. Ni sopiros lian serenon voĉon, tiom ofte balsamo por niaj animoj; lian kompateman rigardon, kiu ŝajnis penetri la plej profundajn dolorojn; liajn manojn, ĉiam pretajn bonvenigi, gvidi kaj levis. Sed kie estas dankemo, tie ne estas funebro. Kie estas senmorteco, tie ne estas adiaŭo. Ni scias — kun la certeco kiun Spiritismo donas al ni — ke Divaldo daŭre vivas: pli libera, pli luma, daŭrigante en spirito la verkon kiu ĉiam estis lia: igi la arbon de la Evangelio floradi, por ke ĝiaj fruktoj de paco, solidareco, kaj frateco nutru ĉiujn angulojn de la Tero.

Nelacigebla pioniro, liaj paŝoj lasis sian spuron en pli ol 70 landoj sur kvin kontinentoj. Liaj tagoj estis plenaj je flughavenoj, busoj, trajnoj, konferencsalonoj kaj temploj de ĉiuj kredoj, kie li portis mesaĝon de konsolo kaj renovigo. Ĉiu urbo kiu bonvenigis lin atestis lian kontaĝan ĝojon, ĉiam akompanatan de la saĝeco de spirito kies misio transcendis homajn limojn.

Por Divaldo, la nombro da aŭskultantoj neniam gravis: ĉu li parolis al du aŭ al du mil, lia entuziasmo restis sendifekta, lia sindediĉo absoluta. Neniuj signoj de laceco, eĉ post elĉerpaj vojaĝoj daŭrantaj ĝis 48 horoj. Lingvaj baroj neniam ekzistis — ĉar, kiel li humile diris, li parolis la universalan lingvon de amo. Tiuj kiuj aŭdis lin neniam forgesis la efikon de liaj vortoj — penetrantaj kaj samtempe mildaj — kaj la ama energio kiu radiis el lia tuta estaĵo.

Kiel unu el la grandaj defendantoj de la spirita movado tutmonde, Divaldo ludis esencan rolon en la kreo de la Internacia Spirita Konsilio (ISK) en 1992. Ĉeestinte la unuan Mondan Spiritan Kongreson en Brasília, Brazilo (1998), li partoprenis en ĉiuj postaj eldonoj: Portugalio (dufoje), Gvatemalo, Francio (dufoje), Kolombio, Hispanio, Kubo kaj Meksiko. Ĉe ĉiu kunveno, lia voĉo leviĝis kiel voko al unueco kaj frata servo, fortigante ligojn kaj inspirante generaciojn daŭrigi sur la vojo de bono.

Kun la sama neskiebla ĝojo, li akceptis la inviton partopreni la 11-an Mondan Spiritan Kongreson en Urugvajo, 2025. Kaj kvankam ni ne plu povas senti lian varman brakumon aŭ vidi lian radian ĉeeston, ni scias ke li estos tie — en spirito — radiantanta la saman lumon kiu ĉiam gvidis nin. Lia vivo estis, kaj restos, lumturo montranta la sekuran vojon de fido, karitato kaj universala amo.

Divaldo ne nur parolis pri amo — li estis la vivanta enkorpiĝo de amo en ago. Li vivis por servi kaj foriris dum li daŭre servis. Kaj tiel, li restas kun ni: en ISK-a asembleoj, en kongresoj, en spiritaj centroj, kaj en la koroj de ĉiuj, kiuj trovis konsolon kaj esperon en liaj vortoj.

Ke la memoro pri Divaldo Pereira Franco estu por ni senĉesa fonto de inspiro, por ke ni povu porti antaŭen lian verkon kun kuraĝo kaj sindediĉo, akceptante la mision disvastigi la mesaĝon de Jesuo ĝis la plej foraj anguloj de la Tero. Ĉar Divaldo montris al ni, per la elokventeco de vivo bone vivita, ke amo estas la plej potenca forto en la universo.

Iam, nia Di silentiĝis,
Kaj la spiro de vivo milde foriĝis.
Prenite de kompato senfina,
Jesuo descendis, etendis la manon divina.

En dolĉa preĝo li preĝis sincere,
Dankis kun koro plej pura kaj vere:
Pro la malriĉuloj, kiujn vi varmigis,
Pro la pano kaj bonoj, kiujn vi donacis.

Pro la kompato, kiu en via brusto floris,
Kaj pro la amo, kiu neniam foriĝis.
Vi sciis ĉiujn ami kaj karesi,
Per vortoj konsoli, per manoj helpi.

Doloron vi ŝanĝis en espero brila,
Kaj larmojn en paco milda kaj trankvila.
Nun estas via tempo... venu kun mi,
Mi donos al vi mian ŝirmejon, ĉiam por vi.

Mi estos ĉe via flanko, kara amiko,
En tiu momento tiel milda kaj tikla.
En la lumo mi vin kondukos,
Por ke vi vivu kiel reĝo, kiun lumo ornamas.

Disĉiplo mi faros el vi ĉi-momente,
Kaj kien ajn mi iros, mi zorgos konstante.
Venu, venu, amata servanto sincera,
Vi portis doloron kun animo sincera.

Kaj eĉ tiel, en via brilo eterna,
Vi daŭrigis semante la amon senfina.

Kelkaj videoj pri la ĉeesto de Divaldo en la Mondaj Kongresoj kaj aliaj okazigitaj de la ISK:

Mesaĝo de Divaldo al la ISK <https://www.youtube.com/watch?v=nQwnheKMFUk>

Mensagem de Divaldo Franco ao Conselho Espírita Internacional no âmbito do "Primer Enquentro Virtual - Un Paseo por la Historia Espírita en Latinoamérica.

<https://www.youtube.com/watch?v=nQwnheKMFUk>

1-a Monda Spirita Kongreso – Brasília 1995

<https://www.youtube.com/watch?v=gzqKqFEYSu8>

4-a Konferenco en Parizo – Kongreso 2004

<https://www.youtube.com/watch?v=dN6e-DbAse8>

<https://www.youtube.com/watch?v=RzuzMwutbQo>

Konferencoj de la 6-a Monda Spirita Kongreso

<https://www.youtube.com/playlist?list=PL8593A2E798CAA9Bo>

https://www.youtube.com/watch?v=q_19NuE7fWY&list=PL8593A2E798CAA9Bo

8-a Kongreso en Portugalio

<https://www.youtube.com/watch?v=2xkCdILZ8B8>

https://www.youtube.com/watch?v=CM5vVbdd_PQ

9-a Konferenco ĉe la Monda Kongreso – Meksiko 2019

<https://www.youtube.com/watch?v=agomodlhOjg>

10-a Monda Spirita Kongreso – Francio (Virtuale) 2022

(Divaldo ekde la 35-a minuto) https://www.youtube.com/watch?v=_ld1Hqomu4k

SPIRITISMO KAJ RELIGIO

LETERO AL SPIRITISMA MOVADO



Mário Frigéri

MÁRIO FRIGÉRI

TRADUKISTO:

Paŭlo Pires

RESUMO:

Ni verkis ĉi tiun artikolon por pripensi, kune kun la gefratoj de la Spiritisma Movado, niajn nunajn agadojn, honorante la heredaĵon de Kardek kaj plifortigante nian sindevontigon al vero kaj karitato. La celo estas instigi ĉiujn por ke niaj agoj daŭre antaŭenigu viglan, unuecan kaj kristan-principan Spiritismon, laborante senlace por pli kohera kaj disvastigita Doktrino kaj por pli konscia kaj feliĉa mondo.

ŜLOSILVORTOJ:

Spiritisma Movado. Kompreno. Diskonigo.

Karaj gefratoj,

La Spiritisma Movado, naskita el genio kaj penado de Allan Kardec, estas lumo kaj gvidilo por ni kaj por milionoj da homoj tra la tuta mondo. Dum unu kaj duona jarcento, ĝiaj ideoj kaj principoj prilumis konsciencojn, antaŭenigante la bonon, la kariton kaj la serĉadon de spirita scio.

Kardec, kun sia rigora metodaro kaj eslorema spirito, starigis la bazojn por nova epoko de kompreno pri vivo, morto kaj spiriteco. Lia senlaca laboro en la Spiritisma Societo de Parizo kaj liaj verkoj, precipe en la *Revue Spirite*, formis Spiritismon kiel ni ĝin konas hodiaŭ, provizante senelĉerpeblan fonton de saĝo kaj gvidado.

Lia vojo en Spiritismo komenciĝis en 1855, kiam li unuafoje aŭdis pri la turniĝantaj tabloj kaj pri la spirita komunikoj. Nature skeptika kaj kun scienca formiĝo, li decidis esplori tiujn fenomenojn kun rigoro kaj seriozeco. La 18an de aprilo 1857 li publikigis *La Libron de la Spiritoj*, rezulton de paciencaj kaj konstantaj dialogoj kun la Spiritoj pere de diversaj mediumoj. Tiu komenca mejloŝtono estis nur la komenco de vojaĝo plena je defioj. Kardec alfrontis reziston kaj opozicion de la Eklezio kaj de konservativaj sektoroj de la socio, kiuj rigardis Spiritismon kiel minacon al siaj establitaj kredoj. Eĉ fronte al tiuj malfacilaĵoj, li konservis sian etikan kaj sciencan sintenon, daŭrigante siajn esplorojn kaj publikigante, sinsekve,

gravajn verkojn kiel *La Libro de la Mediumoj*, *La Evangelio laŭ Spiritismo*, *La Ĉielo kaj la Infero* kaj *La Genezo*. Ĉiu el tiuj verkoj iom post iom kontribuis al firmigo de Spiritismo kiel noviga kaj kohera Doktrino.

Dum jaroj li laboris senlace por disvastigi kaj organizi Spiritismon. Li fondis la Parizan Societon de Spiritismaj Studoj, kiu fariĝis centro de esploroj kaj debatoj pri spiritaĵoj. Krome, li redaktis la *Revue*, monatan periodaĵon kiu servis kiel forumo por la diskuto kaj disvastigo de la ideoj, kiuj fariĝis la celo de lia vivo. Per tiuj iniciatoj li sukcesis altiri nemezureblan nombron da adeptoj kaj simpatiantoj, fortigante la bazon de la Spiritisma Movado. Eĉ fronte al sanproblemoj kaj financaj malfacilaĵoj, li neniam rezignis pri sia misio. Lia sindediĉo kaj rezistema sinteno ebligis, ke Spiritismo firme establiĝu en Francujo kaj disvastiĝu al aliaj landoj. Kiam li elkarniĝis en 1869, li lasis solidan heredaĵon, kun la Spiritisma Doktrino bone fundamentita kaj tutmonde agnoskata kiel fonto de lumo kaj espero por milionoj da homoj.

Spiritisma Movado en tiu tempo

En 1857, kun la publikigo de sia ĉefverko, li komencis tion, kio fariĝus spirita revolucio. La fondo de la Societo en 1858 disponigis gasteman spacon por debatoj, studoj kaj firmigo de la spiritismaj ideoj. Tio estis periodo de intensaj laboroj kaj malkovroj.

Dum tiu tempo, Kardec kaj liaj kunlaborantoj alfrontis multajn defiojn, ekde skeptiko kaj opozicio de konservativaj sektoroj ĝis malfacilaĵoj propraj al la disvastigo de la nova Doktrino. Tamen, spirito de kompreno kaj decidemo restis, ebligante ke Spiritismo establiĝu kiel potenca kaj prilumanta vivfilozofio.

Por Kardec, Spiritismo estis kredo kaj, samtempe, scienco kiu studis la spiritan naturon de la homo; filozofio kiu donis respondojn al ekzistad-demandoj; kaj religio kiu antaŭenigis moralecon kaj kariton. Li vidis en tiu naskiĝanta Doktrino vojon al spirita evoluo de la Homaro.

Spiritisma Movado *post mortem*

Post la elkarniĝo de la Kodiginto, la Movado daŭre kreskis, sen hasto sed konstante, kaj disvastiĝis tra la mondo. Ĝiaj ĉefaj disĉiploj kaj sekvantoj, en pluraj nacioj, ludis elstarajn rolojn en daŭrigo kaj vastigo de Spiritismo.

Markaj eventoj, kiel la Internaciaj Spiritismaj Kongresoj, kaj eminentaĵoj en diversaj landoj, efike kontribuis al disvastigo de tiu nova idearo. Tiuj personoj helpis firmigi la Movadon kaj pligrandigi ĝian monds kalan influon.

La Movado frontis konsiderindajn defiojn dum jaroj, inkluzive de internaj malkonsentoj, la bezono adaptiĝi al malsamaj kulturaj kunteksto, kaj la persista rezisto de iuj partoj de la socio. Tamen, la esenco de la instruoj de Kardec restis netuŝita, gvidante la spiritistojn en ilia vojaĝo.

Spiritisma Movado hodiaŭ

Nuntempe, kaj sen bruo, ĝi ĉeestas en ĉiuj kontinentoj, kun spiritismaj centroj, studgrupoj kaj bonfaraj aranĝoj agantaj en diversaj kampoj. En landoj kiel Brazilo,

Portugalujo, Francujo kaj Usono, Spiritismo havas precipe fortan ĉeestadon, kun miloj da adeptoj.

Nuntempaj atingoj de la Movado estas multnombraj, ekde publikigo de literaturaj kaj sciencaĵoj ĝis organizado de eventoj kaj kongresoj, kiuj antaŭenigas interŝanĝon de ideoj. Bonfarado restas fundamenta kolono, kun sennombraj iniciatoj celantaj helpi bezonantojn.

Tamen, ĝi ankaŭ frontas kelkajn defiojn en moderna mondo. La bezono adaptiĝi al novaj teknologioj, integriĝi kun aliaj kampoj de scio, kaj konservi integrecon de la instruoj de Kardec estas fundamentaj aferoj, kiuj postulas atenton kaj konstantan penadon.

Kio estas tiu Movado

Kiam ni parolas pri Spiritismo kaj pri la Spiritisma Movado, ambaŭ nuntempe de planeda amplekso, ni ripetas nin kaj parolas pri la sama afero. La Movado ĉerpas sian forton el la principoj de Spiritismo, kaj inter ĝiaj fundamentaj kvalitoj, sen intenco elĉerpi la temon, oni povas mencii la jenajn dek kvin:

1. ĜI ESTAS AMO AL BONO

Spiritismo estas, en sia esenco, amo al bono. Tiu amo manifestiĝas per konstanta serĉo de praktikoj, kiuj antaŭenigas bonfarton kaj feliĉon al la proksimulo. Ĝi implicas veran sindonemon, kie la individuo metas la komunan bonon super personajn interesojn. Tiu praktiko inkluzivas rezignon je negativaj sentoj kiel envio kaj ĵaluzo, anstataŭigante ilin per profunda deziro helpi kaj altigi aliajn. Ĝi postulas kultivadon de pura koro, turnita al boneco kaj malavareco, fariĝante ekzemplo de virto kaj altruismo.

2. ĜI ESTAS BONFARADO EN MOVO

En ĝia koro loĝas karitato, kiu estas la esenco de ĉiuj homaj devoj. Laŭ la Doktrino, karitato estas ago doni, kaj "esti-stato", kiu inkluzivas komprenon, empatian kaj konstantan subtenon al proksimulo. Ĝi instruas homon sperti kariton ĉiutage, en pensoj, vortoj kaj agoj, etendi la manon al bezonantoj, konsoli afliktitojn kaj ĉeesti en vivo de tiuj, kiuj suferas. Vera spirita karitato estas kontinua kaj nelacigebla fluo direktiganta al amo por proksimulo, sen atendi rekompencan aŭ rekonon.

3. ĜI ESTAS STATO DE FELIĈO

Ĝi donas staton de feliĉo, kiam oni ĝin komprenas en ĝia vera esenco. Proponante respondojn al la ekzistecaj demandoj kaj pli grandan celon por la vivo, ĝi tuŝas la plej senteman kordon de pensanta estaĵo: la serĉadon de feliĉo. Tiu feliĉo konsistas el estonta promeso kaj ankaŭ el io, kion eblas sperti ĉi tie kaj nun, pere de praktikado de bono kaj vivado de spirita virtoj. La interna paco kaj ĝojo, kiuj rezultas el kompreno kaj praktikado de Spiritismo, kreas cirklan reagon, antaŭenigante staton de bonfarto, kiu disvastiĝas inter ĉiuj, kiuj adoptas tiujn principojn.

4. ĜI ESTAS ANTAŬDESTINO DE BONECO

Ĝi estas rigardata kiel Doktrino, kiu nature kondukas al boneco. Ĝia filozofio instigas internan transformiĝon, igante ĉiun individuon iĝi homo de bono. Por nekredulo, kiu konas nur la filozofiajn principojn de Spiritismo, evidentiĝas, ke sekvado de ĉi tiuj instruoj neeviteble kondukas al amo al proksimulo. Ĉi tiu Doktrino, promociante valorojn kiel justeco, frateco kaj kompato, skulptas homojn pli konsciajn pri siaj moralaj kaj sociaj respondecoj, farante la bonecon natura sekvo de ilia lernado kaj praktiko.

5. ĜI ESTAS KRISTANISMO SEN DISTORDOJ

Ĝi reprezentas Kristanisman en pleneco de ĝiaj originaj kvalitoj, libera de la distordoj, kiujn tempo kaj homoj trudis al ĝi. Ĝi adaptas la instruojn de Jesuo al evoluo de homa inteligento, oferante racian kaj koheran interpretadon de la spiritaĵoj. Fokusiĝante al esenco de la kristanaj instruoj, sen misuzoj kaj dogmoj, kiuj ofte mallumigis ĝian mesaĝon, ĝi kreskas eĉ sub persekuto. Ĝia forto kuŝas en la universala Vero, kiun ĝi disvastigas, invitante ĉiujn al pli profunda kaj vera kompreno de la Krista mesaĝo de amo kaj elaĉeto.

6. ĜI ĈEESTAS VIVE EN HOMO

Ĝi estas viva ĉeestado ene de ĉiu homo. Ĝiaj principoj estas tiel raciaj kaj universalaj, ke ili resonas en multaj mensoj kaj koroj, eĉ se nevole. Tuŝante esencajn demandojn pri la homa ekzistado, ĝi penetras en pensadon kaj spiritecon de la homoj. Ĝi invitas al profunda kaj natura introspekto, kiu vekigas la spiritecon enecan al ni ĉiuj. Eĉ tiuj, kiuj ne konsideras sin spiritistoj, eble sen konscio praktikas tiujn principojn en sia ĉiutaga vivo, pro ilia profunda racieco kaj universaleco.

7. ĜI ESTAS LEĜO DE NATURO

Ĝi ne estas nur teoria aŭ filozofia sistemo, kiun eblus kontraŭbatali per alia simila sistemo. Ĝi ripozas sur fundamenta leĝo de Naturo kaj daŭrigas sian regulan marŝon, same kiel okazas kun la Ter-movado ĉirkaŭ la Suno. Tiu natura bazo donas al ĝi solidecon, kiu staras super debatoj kaj teoriaj refutoj. Ĝi malkaŝas universalajn verojn pri vivo kaj Transmondo, ankritajn en naturaj fenomenoj observeblaj kaj eksperimenteblaj. Tiel ĝi prezentas sin kiel scienco de la animo, fondita sur neŝanĝeblaj kaj eternaj principoj, kiuj regas la homan ekzistadon.

8. ĜI ESTAS SCIENCO, KIU POSTULAS SINDEDIĈON

Kiel ĉiu alia scienco, ĝi postulas studadon kaj sindediĉon por esti plene komprenata. Ĝi ne povas esti lernata improvize, supraĵe aŭ senpene, kvazaŭ per osmozo. Ĝia kono postulas seriozan kaj metodan aliron, kie esplorado, konstanta studo kaj pripensado estas esencaj. Esti spiritisto signifas ekiri vojon de senĉesa lernado, esplorante la profundojn de la spirita scienco kun sama rigoro kaj seriozeco dediĉataj al materiaj sciencoj, rekonante la kompleksecon kaj profundon de la leĝoj pri animo.

9. ĜI ESTAS KONSTANTA LABORO

Ĝi implikas daŭran kaj senlacigan laboron. Ne sufiĉas ricevi spiritajn instruojn. Necesas kvar aferoj: profunde pripensi ilin, labori interne, mense kaj kore, por kompreni ilin kaj, fine, post kiam oni ilin asimilis, praktiki ilin. Ĉiu ricevita leciono estas nur komenco de vojaĝo de introspekto kaj praktiko. Ĝia vera profitanto dediĉas sin transformi la akiritan konon en vivatan saĝon, penante ĉiutage apliki tiujn principojn en sia vivo. Tiu konstanta laboro estas tio, kio ebligas veran internan transformon de la estaĵo, kun kompreno kaj integriĝo de ĝiaj instruoj en la ĉiutago.

10. ĜI ESTAS UNIVERSALA INSTRUO

Ĝi distingas sin de aliaj filozofioj kaj religioj pro sia nesekta kaj universala karaktero. Ĝi ne estas produkto de koncepto el unu sola individuo, sed

rezulto de kolektiva kaj universala instruado, atingebla por ĉiuj ie ajn en la mondo. Tiu universalecon donas al ĝi unikan kaj ĉieestan forton, ĉar ĝiaj instruoj estas konfirmitaj de multoblaj spiritaj fontoj en diversaj kulturoj kaj kunteksto. La universala kontrolo de spiritaj instruoj certigas la Doktrinan unuecon, pli efike ol iu ajn homa koncilio. Ĉi tiu trajto pri foresto de limoj faras el Spiritismo malfermita kaj atingebla filozofio, kiu akceptas kaj integras la diversecon de tutmondaj spiritaj spertoj.

11. ĜI ESTAS NEANSTATAŬEBLA DOKTRINO

Ĝi estas doktrino, kiu restas neŝancelebla antaŭ kritikoj kaj opozicio, ĉar ĝi ofertas logikajn kaj kontentigajn respondojn al la plej profundaj demandoj pri la homa ekzistado. Tiuj, kiuj provis kontraŭbatali ĝin, simple, sen konscio, plifortigis ĝian gravecon vekante scivolemon kaj intereson de homoj pri ĝi. Ĝia forto kuŝas en la solideco de ĝiaj instruoj kaj en la feliĉo, kiun ĝi alportas al la homo, fariĝante tiel neanstataŭebla de iu alia filozofio aŭ kredo, sen ajna malestimo al ili. Estas malfacile trovi ion, kiu proponas pli kompletan komprenon kaj pli logikan solvon por tiuj spiritaj demandoj, kiujn ĝi traktas.

12. ĜI ESTAS NORMO, KIU NE ANTAGONISMAS

Ĝi adopta sintenon de respekto kaj interkonsento, forĵetante iun ajn rektan konflikton kun aliaj kredoj aŭ individuoj. Ĝi serĉas laŭdigi tion, kio estas pozitiva kaj vera en ĉiuj tradicioj kaj filozofioj, antaŭenigante sinceran spiriton de frateco kaj reciprokkompreno. Anstataŭ kritiki aŭ malkvalifikigi aliajn opiniojn, ĝi ĉefe emfazas la universalajn valorojn, kiuj unuigas la Homaron, antaŭenigante pacon kaj harmonion. Tiu sinteno de respekto kaj rekono reflektas la kompateman kaj ameman esencon de ĝia Doktrino, kiu celas la moralan kaj spiritan altiĝon de ĉiuj.

13. ĜI ESTAS ĈEESTADO KIU KONSOLAS

Ĝi ofertas profundan konsolon invitante la spiritistojn projekcii siajn pensojn al la estonteco, antaŭenigante longdaŭran vidon, kiu malpliigas angorojn de la nuna momento. Ĝi instruas, ke nuntempaj malfacilaĵoj kaj zorgoj estas traireblaj, kaj ke vera graveco kuŝas en estonteco, kiu estas formita de la hodiaŭaj agoj kaj elektoj. Tiu fokuso al estonteco donas konsolon kaj esperon, helpante individuojn alfronti la tujajn defiojn sub mantelo de sereneco kaj fido. Tiel ĝi konsolas la animojn per inspiro de optimisma kaj superlativa perspektivo pri la vivo.

14. ĜI ESTAS ESTONTECO DE IMPONA UNUECO

Ĝi antaŭvidas estontecon de admira harmonio kaj unuiĝo, kie la veraj servistoj de Dio estos rekonitaj pro sia kuraĝo, firmecon kaj persisto. La Doktrino alfrontos provojn kaj konfliktojn de ideoj, sed tiuj malfacilaĵoj servos por fortigi la konvinkon kaj decidon de la spiritistoj. La Doktrina impona unueco estos potenca forto, rezulto de la kuneco kaj fideleco de ĝiaj anoj. Tiu promesplena estonteco estas konstruita sur tia solida bazo de spiritaj kaj moralaj principoj, kiuj rezistas al malfacilaĵoj kaj aperas eĉ pli fortaj antaŭ la defioj.

15. ĜI ESTAS MOVADO, KIUN KRISTO PREZIDAS

Ĝi estas, fine, gvidata de la moralaj kaj spiritaj principoj instruataj de Jesuo Kristo, metante fratecon kaj humilecon kiel esencajn bazojn de sia praktiko. Ĝia supereco estas ekskluzive morala, reflektita en spontanea kaj sincera aliĝo de tiuj, kiuj dividas ĝian vizion. Ne ekzistas oficiala potenco aŭ privilegio postulebla de la spiritistoj. La sola distingilo estas frateco en kredo. Tiu egalecon kaj simplecon reflektas tiun esencon de la kristana instruo, antaŭenigante inkluzivan kaj ameman Movadon, kie ĉiuj estas bonvenaj kaj respektataj.

Finaj vortoj

Respekti, do, la heredaĵon de Kardec signifas pli ol honori lian memoron; ĝi implicas daŭrigi lian laboron per sindediĉo kaj amo. Estas esence, ke nunaj spiritistoj penadu por teni vivanta la flamon de Spiritismo, antaŭenigante studon, moralecon kaj kompaton en ĉiuj siaj agoj.

Ĉiu spiritisto havas respondecon kontribui al fortigo de la Movado, donante la plej bonon el si kaj laborante por pli justa kaj saniga mondo. Unueco kaj kunlaboro inter spiritistoj estas fundamentaj por superi defiojn kaj atingi komunajn celojn.

Ke la Spiritisma lumo daŭre brilu intense, lumigante mensojn kaj korojn. Per kolektiva penado kaj inspiro de tiaj pli altaj Spiritoj, ni povas konstrui estontecon kie paco, frateco kaj spirita evoluo fariĝu realo por la tuta homaro.

Jen granda defio, kiun Spirito de Vero hodiaŭ starigas antaŭ ĉiu el ni. Spiritismo kaj Spiritisma Movado progresos ĉiam pli laŭ rekta proporcio de kompreno, kiun la mondo havos pri ĝia dia esenco. La sekreto pri ĝia disvastigo estas doni al la

homo ŝlosilon de feliĉo, kiu estas ĉefa kialo de la homa ekzistado. Kaj ĝi estas ankaŭ la sekreto, kiu igos ambaŭ triumfi, malfermante al Homaro, vaste kaj senlace, la pordojn de Nova Ĉielo kaj Nova Tero, kiuj venos.

Jen tio. Ni eklaboru! Ne estas tempo stari timige antaŭ tia senpara grandeco de nia Doktrino. Necesas transformi teoriiston en praktikanton, metante en la animon de ĉiu homo tion, kion Dio donis senpage en nian koron. Ĉiuj, kiuj sin ĵetos al tiu tasko, ricevos centoblan rekompenco de Nia Sinjoro Jesuo Kristo, kaj senfinan dankemon de ĝia plej fervora mesaĝisto en ĉi tiu mondo – Allan Kardec. Jen nia elkora mesaĝo al estimataj fratoj de la tutmonda Spiritisma Movado. Paco, amo kaj lumo por ĉiuj.

Aŭtora noto: Ni verkis ĉi tiun artikolon post meditata relegado de la libro *Instruoj de Allan Kardec al Spiritisma Movado*, organizita de nia amiko Evandro Noletto Bezerra, tradukinto de Kardec-verkoj kaj redaktoro de *Reformador*, la monata revuo de Brazilia Spiritisma Federacio.

SPIRITA MOMENTO NE REZIGNI PRI LA BONO

Multaj el ni iras tra la vivo strebante fariĝi pli bonaj homoj.
Ni pripensas niajn agojn, konsideras kiel agi ĝuste, elektante la plej bonan opcion.
Ni klopodas helpi la proksimulojn, volontulas en aferoj kiuj, laŭ ni, kontribuas pozitive al la socio.
Ni apartenas al tiuj, kiuj zorgas pri konservado de la medio, ŝanĝante konsumkutimojn, recikligante rubon kaj ne malŝparante naturajn rimedojn.

Tamen, estas tagoj kiam ni demandas nin ĉu ĉio ĉi ne estas sensenca tempo-malŝparo, vana kaj senutila penado.
Ni rigardas la novaĵojn kaj vidas la plej diversajn absurdaĵojn:
Oftaj trompoj en sociaj retoj, kie oni uzas valorajn intelektajn rimedojn kaj teknologion por senhavigi samhomojn, precipe la plej vundeblajn.
Kaoso en la hejmoj, kie infanoj kaj gepatroj kverelas morale kaj fizike pro mono, heredaĵoj kaj materialaj havaĵoj.
Krimoj kaj krimuloj ĉeestas apud ni, en la stratoj kun armiloj aŭ en elegantaj oficejoj farante grandegajn financajn fraŭdojn.

Ĉio ĉi kondukas nin al la penso, ke eble ne indas esti etika, ĝusta kaj bona.
La mondo ŝajnas kiel sovaĝa ĉevalo sen rajdanto, panoramo kie la malbonuloj ĉiam venkas kaj la mondo apartenas al ili.

Sed ĉi tio estas nur pasema impresio de mondo en transiro, en ŝanĝiĝo.
Ni travivas la naturan etik-an moralan krizon de civilizacio laca pro tio, kio gvidis ĝin ĝis nun, serĉante novajn valorojn.
Estas nature, ke en tiaj momentoj la malbonuloj, ne dezirantaj ŝanĝojn aŭ plibonigon de la planedo, agas kun pli da vigleco kaj intenseco.
Eble ili timas, ke baldaŭ ili ne plu trovos lokon por siaj malbonagoj.

Tial ni vidas tiom da frenezo en la sociaj, politikaj kaj religiaj sferoj de nia socio.
Estas la lastaj konvulsioj de epoko kiu atingas sian finon.

Dume, ni havas la impreson, ke ni estas malplimulto—ni kiuj klopodas por la bono kaj etiko.
Ŝajnas, ke ni estas tiel malmultaj, kiuj deziras varmegan justecon kaj inkluzivan socion.
Sed tio estas nur iluzio.
Tio okazas ĉar la malbonuloj estas bruaj, aŭdacaj. La skandaloj, kiujn ili kaŭzas, ŝokas kaj efikas.

Intertempe, legioj da homoj praktikas la bonon, etikon kaj moralecon silente, en siaj hejmoj, en siaj entreprenoj, en siaj temploj kaj en sia libertempo.

Tial ni ne rezignu je nia sopiro esti pli bonaj.
Eĉ kiam ni renkontas la malhonestulojn, la nedignulojn kaj la kruelulojn, ni persistu en nia celo.

Ni persistu por vidi, malrapide sed konstante, la moralan pejzaĝon de nia planedo transformiĝi.

Kaj kiam ni malplej atendas, ni konstato, ke la malbono estos la escepto, la korupto ne estos plu tolerata, kaj nobla karaktero estos postulata en ĉiuj sferoj de la socio.

Ni ne lasu nin deprimigi de tiuj pasemaj momentoj de frenezo kaj sensaĝeco, tra kiuj ankoraŭ trapasas parto de la homaro.

Resti en la bono signifas esti referenco por tiuj, kiuj iom post iom volos sekvi nin, imitante nin.

Ni ne rezignu pri la bono.

Redakcio de Spirita Momento

NOVAĴOJ REVUE SPIRITE N21

01. 11-A MONDA SPIRITA KONGRESO EN URUGVAJO

Punta del Este, Maldonado – 4–5 oktobro 2025

La Kongresa Centro de Punta del Este gastigos la 11-an Mondan Spiritan Kongreson (MSK), evento kiu promesas esti unika okazo por studo, kunhavigo kaj spirita kresko.

La kongreso celas profundigi sciojn pri spirita vivo, surtera vivo kaj la celo de la individuo en la solidara ĉeno de la sinsekvaj reenkarnejoj de la Spirito. Partoprenantoj povos mergi sin en atmosfero de lernado dum ili kunhavigas spertojn kun homoj el la tuta mondo.

La evento havos prelegojn, rondotablojn, kulturajn momentojn kaj—por la unua fojo—la 1-an Mondan Spiritan Junularan Kongreson, dediĉitan al junuloj, instigante ilin pripensi la sencon de la vivo, memkonon kaj la rolon de ĉiu individuo en la regenerado de la mondo.

PROGRAMO DE LA 11-A MONDA SPIRITA KONGRESO – VIVO POST VIVO

Aŭditorio 1

Sabato, 4-a de oktobro

- 09:00 – Malfermo
- 09:45 – Prelego: *La Celo de la Vivo* – Eduardo dos Santos (Urugvajo)
- 10:30 – Rondotablo: *En Serĉo de Mem: Malkovrante Internan Veron*
- 12:00 – Tagmanĝo
- 13:45 – Prelego: *Semi, Rikolti, Evolui: La Ciklo de Ekzisto* – Artur Valadares (Brazilo)
- 14:30 – Rondotablo: *Originoj kaj Destinoj: Spirita Rigardo pri Homdiverseco*
- 16:30 – Prelego: *Ĉielo aŭ Infero: Al Spirita Vivo* – Denise Lino (Brazilo)
- 17:15 – Demandoj kaj Respondoj
- 18:00 – Literaturo-muzikaj Reflektoj: *Vivo Post Vivo*
- 18:45 – Fina Preĝo

Dimanĉo, 5-a de oktobro

- 08:30 – Malfermo kun muzika momento
- 09:00 – Prelego: *La Liberiĝo el Malfeliĉo* – Jorge Elarrat (Brazilo)
- 10:00 – Rondotablo: *La Resaniga Poveco de Amo*
- 11:30 – Prelego: *Vivo: Defioj kaj Solvoj* – Edwin Bravo (Gvatemalo)
- 14:00 – Rondotablo: *Esplorante Trans la Vivo: Kien Ni Iras?*
- 15:30 – Konversacio: *Mediumeco: Etiko en la Komunikado kun Spiritoj*

- 16:45 – Rondotablo: *Ŝultro al Ŝultro, Flanko al Flanko: Individua kaj Kolektiva Engaĝiĝo fronte al la Regenerado de la Tero*
- 18:15 – Fermo kaj Fina Preĝo

JUNULARA PROGRAMO – Aŭditorio 2

Sabata mateno | Mi kaj la Vivo

- 08:00 – Bonveno kun muzika akcepto
- 09:00 – Oficiala Malfermo kun teatra skeĉo
- 10:05 – Enkonduka agado
- 10:45 – Doktrina Prelego: *La Celo de la Vivo* – Victor Hugo Guimarães
- 11:40 – Sperta Agado: *En Serĉo de Mem: GPS de la Vivo*
- 13:05 – Reflekta Dialogo pri la Agado
- 13:25 – Tagmanĝo

Sabata posttagmezo | Mi kaj la Spirita Mondo

- 14:45 – Muzika akcepto kaj teatra skeĉo
- 15:10 – Agado: *Labirinto de Spertoj*
- 17:05 – Babilejo: *La Junuloj Volas Scii!* – Jorge Elarrat
- 18:00 – Literaturo-muzikaj Reflektoj: *Vivo Trans la Vivo*
- 18:45 – Fermo

Dimanĉa mateno | Mi kaj la Sperto de Amo

- 08:00 – Akcepto kun muziko
- 08:30 – Preĝo kaj teatra skeĉo
- 09:00 – Doktrina Prelego: *La Sperto de Amo* – Arthur Valadares
- 09:40 – Praktika Laboratorio (tri etapoj): *Amo al Dio, al la Proksimulo kaj al Mem*
- 12:40 – Finaj Reflektoj kaj Muzika Momento
- 13:00 – Tagmanĝo

Dimanĉa posttagmezo | Mi, Spiritismo kaj la Regenerado de la Tero

- 14:15 – Muzika akcepto kaj teatra skeĉo
- 14:50 – Doktrina Prelego: *Vivo: La Granda Ŝanco* – Marina Alves
- 15:10 – Fina Sperta Agado
- 16:45 – Rondotablo: *Ŝultro al Ŝultro, Flanko al Flanko: Individua kaj Kolektiva Engaĝiĝo fronte al la Regenerado de la Tero*
- 18:15 – Fina Ceremonio

02. INTERNACIA KATALOGO DE LIBROJ PRI MEDIUMECO

La Internacia Spirita Konsilio (ISK), pere de sia Airejo de Studo kaj Praktiko de Mediumeco, publikigis la *Katalogon de Libroj pri Mediumeco*, referenca verko destinita al esploristoj, spiritaj laborantoj kaj ĉiuj interesatoj pri profundigo de la studo de mediumaj kapabloj.

La katalogo estas rezulto de kunlabora laboro de tradukistoj kaj spiritaj laborantoj el diversaj landoj, kolektante titolojn en 13 lingvoj, inkluzive de la portugala, angla, hispana, franca, itala, germana kaj rusa.

La iniciato celas faciligi la aliron al la ĉefaj verkoj pri mediumeco kaj antaŭenigi la disvastigon de spirita scio tra diversaj kulturoj kaj lingvaj kuntekstoj.

La dokumento estas disponebla senpage ĉe: *Katalogo de Libroj pri Mediumeco – ISK (2025)* [Catálogo de Livros sobre Mediunidade – CEI \(2025\)](#)

03. RETA KOLEKTO PRI MONDAJ SPIRITAJ KONGRESOJ

La Airejo de Spirita Socia Komunikado de la Internacia Spirita Konsilio (ISK) kreis, en la oficiala retejo de la institucio, specialan kolekton dediĉitan al la Mondaj Spiritaj Kongresoj (MSK).

La sekcio unue kunigas bazajn informojn pri la 11 jam okazintaj eldonoj, komencante per la 1-a Monda Spirita Kongreso, okazinta en 1995 en Brasília (Brazilo). La sukceso de tiu unua renkontiĝo starigis la modelon por la sekvaj kongresoj, okazantaj ĉiujn tri jarojn en diversaj landoj.

La celo de la kolekto estas konservi la memoron pri ĉi tiuj eventoj kaj faciligi la aliron al ilia historia enhavo. La materialo estos iom post iom ĝisdatigata, per la aldono de dokumentoj, bildoj, filmetoj kaj aliaj registritaj materialoj.

Kun ĉi tiu iniciato, la ISK plifortigas sian engaĝiĝon antaŭenigi kaj valorigi la historion de Spiritismo je tutmonda skalo.

[World Spiritist Congresses – ISC](#)

04. MONDA SPIRITA JUNULARO RENKONTIĜAS POR NOVA STUDKUNVENO

Dimanĉe, la 27-an de julio, okazis alia renkontiĝo de la Studgrupo de la Monda Spirita Junularo 2025, organizita de la ISK.

La renkontiĝo kunvenigis junulojn el diversaj partoj de la mondo, kiuj kunhavigis gravajn spiritismajn instruojn. La temo «*Kiaj estas miaj talentoj?*» alportis tre riĉajn momentojn de pripensado kaj interŝanĝo inter la mondaj junuloj.

Inspirite de mesaĝoj de Jesuo, Allan Kardec, Emmanuel, Léon Denis, inter aliaj, la agadoj kaj dinamikoj favoris valorajn reflektadojn pri la talentoj evoluantaj dum la

spirita vojaĝo, same kiel la inviton dediĉi ilin al la antaŭenigo de bono kaj la konstruado de paco.

La ISK dankas la ĉeeston de la novaj junuloj kaj tiujn, kiuj daŭre ĉeestas la semajnajn renkontiĝojn, okazantajn ĉiun dimanĉon en diversaj lingvoj, fortigante la unuiĝon de la Spiritisma Movado tutmonde.

La sekva renkontiĝo okazos la 31-an de aŭgusto (la lasta dimanĉo de la monato), kun la temo: «*Kio estas mia rolo en la regenerado de la Tero?*»

[Registration Form](#)

o5. RETA KONVERSACIO PRI SPIRITA SOCIA HELPO KAJ PROMOCIO

La 10-an de aŭgusto 2025, la Airejo de Spirita Socia Helpo kaj Promocio de la ISK okazigis retan konversacion kun la temo:

«La Graveco de la Laboro de la Airejo de Spirita Socia Helpo kaj Promocio.»

La kunveno havis la partoprenon de Jussara Korngold, Ĝenerala Sekretario de la ISK, Vicprezidanto de la Unuiĝintaj Ŝtatoj Spiritisma Federacio kaj Plenumdirektoro de la TriState Spiritisma Federacio, kaj estis moderata de Wendy Castañón, Kunordiganto de la sama Areo ĉe la ISK.

Ĉi tiu iniciato fortigis la mision de la ISK instigi kunlaboron kaj sperto-kunhavigon inter spiritismaj laborantoj el diversaj landoj, plifortigante la unuiĝon ĉirkaŭ la idealoj de frateco kaj servo al la proksimulo.

o6. VIVAJ SESIOJ "DIALOGOJ PRI MEDIUMECO": ETIKO KAJ RESPONDECO

Dum aŭgusto 2025, la Airejo de Studo kaj Praktiko de Mediumeco de la ISK okazigis du vivajn sesiojn de "*Dialogoj pri Mediumeco*", dediĉitajn al la temo: «Etiko kaj Respondeco en Mediumeco.»

La unua kunveno okazis en la angla, dimanĉe la 24-an de aŭgusto, en formo de rondotablo, kun la partopreno de João Korngold (Spiritist Group of New York, Usono), Stevan Bertozzo (Irish Spiritist Federation, Irlando) kaj Thiago Keller (Allan Kardec Vancouver Society, Kanado), sub la moderado de Dan Assisi (California Spiritist Association, Usono).

La dua sesio, en la hispana, ankaŭ en rondotabla formato, kunigis Jorge Camargo kaj Patricia Rodriguez (Consejo Espirita de México, Meksiko) kaj Carlos Campetti (Brazila Spiritisma Federacio, Brazilo), kun la moderado de Walter Velásquez (Asociación Salvadoreña de Escuelas Espiritas, Salvadoro).

Ambaŭ kunvenoj ofertis spacon por debato, pripensado kaj internacia interŝanĝo pri mediuma praktiko, traktante la etikajn principojn kaj la respondecon de mediumoj en la evoluo de siaj spiritaj kapabloj.

Ĉi tiuj iniciatoj plifortigis la engaĝiĝon de la ISK antaŭenigi la studon kaj praktikon de mediumeco laŭ etika kaj konscia maniero, samtempe antaŭenigante la unuiĝon kaj kunlaboron inter spiritismaj laborantoj el diversaj landoj kaj kulturoj.

[YouTube-ligo](#)



Social Media

Facebook

Instagram

Youtube

Online

<https://cei-spiritistcouncil.com>

revuespirite@cei-spiritistcouncil.com

